



Sekolopotlana sa Matšhamatsholo se tsaya loeto go ya Motse Kapa

Setswana

Notozi Mgobozi



Sekolopotlana sa Matšhamatsholo se tsaya loeto go ya Motse Kapa

Mokwadi Notozi Mgobozi
Motaki Dale Blankenaar



Thanolo ka Motlhabane Modise

Barutwana ba sekolo sa Mofenyi, go tswa kwa Motubatuba, ba ipaakanyetsa loeto go ya kwa Motse Kapa.

Pele ga malatsi a boikhutso a Selemo, barutwana ba kopiwa go ipaakanyetsa loeto, fela mogokgo a seka a ba bolelela gore ba tlile go tsamaya jang.

Morago a dira kitsiso gore go tlile go tsamaya fela barutwana ba mophato wa boraro (3).


Kitsiso e, ya utlwise barutwana ba bangwe bothoko.



Barutwana bangwe ba seka ba itumela, mme
ba ngenegile gonne mogokgo a re, ba santse ba
le banye go ka tsaya loeto lo, gape a re, batla
bona monyetla ngwaga yo o tlang.

Fa dikolo di tswalelwa kwa bokhutlong jwa
kwatara, barutwana ba mophato wa boraro (3)
ba simolola go balela go ya kwa bokhutlong
jwa kwatara e e latelang, moo ba tlaa bong
ba tsaya loeto.

Barutwana ba, ba ne ba
itumeletse nako e,
moo ebileng bangwe,
ba ne ba sa reetse
ka fa phaposing,
kantlha ya
boitumelo.



Mogokgo ga a ba bolelela gore, ba ya go dirisa sefofane go ya Motse Kapa, le gore sefofane se ya go palamelwa kwa *East London*.

Maikaelelo e ne e le go fokotsa ditshenyegelo, go na le fa ba ne ba tsamaya ka bese.

Mongwe le mongwe o ne a simolola go ikgantsha, ka tseo batsadi ba ba reketseng, go ipaakanyetsa loeto.



Barutwana ba boeletswa ka Mosupologo, letsatsi pele ba tsamaya gore ba seka ba ipaakanyetsa mofago wa tsela.

Mo letsatsing la go tsamaya, mongwe le mongwe o ne a itumeletse go bona ditekisi di le pedi, di ba emetse mo mosong ka fa jarateng ya sekolo.

Ba ne ba felegeditse ke batsadi ba bona, ba itatile ka dikobo gonne e ne e le moso yo o tsididi.





Bangwe ba bona ba rwele dikobo tse di boima,
le fa batsadi ba bona ba itse gore ga baa
tshwanela. Ba letleletswe fela go tsaya kgetsana
kgotsa kheisi ya diaparo.

Ba namela ditekisi mo jarateng ya sekolo, mme
ba tloga ba ya kwa boemelafofaneng jwa
East London.

Ba tshogile botlhe gonne go se ope wa bona yo
o neng a itse gore ba ya go dirisa sefofane go ya
Motse Kapa.

Bangwe ba simolola go lela, ka gonne ba tshaba
sefofane le go fofela kwa lefaufaung.



Barutabana ba tshwere bothata go didimatsa bana, bao ba neng ba tshaba go pagama sefofane.

Mogokgo a ba kgalemela e bile a ba tshosetsa gore ba tlaa tshwarwa ke maphodisa.

Ba emisa go lela botlhe mme ba tsena ka mojako wa boemelafofane ba lebelela tikologo, ba makatswa ke dilo tseo e leng gona ba di bonang lwantlha. Ba bangwe ba tshega ka ntlha ya boitumelo.



Fa sefofane se sena go kotama, barutwana ba tsamaya ka mola go ya go pagama sefofane.

Ba bangwe ba setse ba ntse fa fatshe ka fa sefofaneng, ba thusitswe ke mothusa-bapagami a ba kopela ka mapanta a tshireletso.

Bangwe ba ntse ba lebeletse ka kgakgamalo, ba bonala ba sa itumela e bile ba tshogile.

Fa e nna nako ya gore sefofane se tloge, mothusa-bapagami a ema, fa pele ga sefofane a bontsha melawana e e tlwaelegileng ya sefofane.

Rego yo o dingwaga di le robongwe (9), a tshwere Khemera a tsaya ditshwantsho.

Mothusa-bapagami a mo laela go nna fa fatshe le go ipanta, gonne nako e sa mo letle go tsaya ditshwantsho. Rego a nna fa fatshe mme a lebega a swabile a kgwageditse khemera mo molaleng. Fa sefofane se tloga go tswa fa fatshe, barutwana ba bangwe ba basimolola go lela, kantlha ya letshogo. Ba gomodiwa ke mothusa-bapagami le bapagami ba bangwe bao ba neng ba ntse fa thoko ga bona.



Mosimane mongwe yo o neng a ntse fa gaufi ga letlhabaphefo, a goeletsa a supa kwa ntle ga letlhabaphefo a re, "re fofa kwa godimo ga lewatle, re ya go nwela!" Ba ne ba didimetse botlhe ba lebeletse kwa matlhabaphefong. Nako yotlhe eo, loeto a fitlhile sephuthelwana se tletse dijo. A goeletsa ba bangwe, mme a ba laletsa dijo, a re, "tlayang re jeng, ke tshwerwe ke tlala."



A kopiwa go nna fa fatshe le go tswalela
pakete ya dijo, gonne ba tlile go newa dijo tse di
botlhofonyana. Barutwana ba bangwe ba tshega,
fa a ne a kgalemelwa ke morutabana wa gagwe.
Loeto o ne a ipolelela gore, o ya go itumelela
dijo tsa gagwe, fa a goroga kwa Motse Kapa.
Ba ne ba newa dijo tse di botlhofo, mme ba ja
ba itumetse.



Sefofane sa kotama, kwa boemelafofaneng jwa Kapa ka lobelo. Barutwana ba bangwe ba itumetse, ba emeletse ba lebile ka matlhabaphefo. Bangwe ba santse ba tshogile ba tshwerwe ke bapagami ba bangwe ka matsogo, ba ba thusa go pagologa setepisi. Ba fologa go ya go tsaya merwalo ya bona kwa lepanteng le le tsamaisang merwalo ba ntse ba goeletsa ka boitumelo. Bese e ba emetse kwa patlelong eo go emang dibese kwa teng.



Barutwana ba tshogile e bile ba itumetse ba lwela manno ka fa beseng, mongwe le mongwe a ipatla gonna mo letlhabaphefong, gore ba kgone go bona bontle jwa Motse Kapa.

Ba bo ba ya kwa hoteleng ya Blue Moon eo e neng e lebile lewatle kwa Sea Point. Ba pagologa bese, ba ya go tsaya merwalo ya bona. Bangwe ba setse ba apola diaparo ba batla go ya go thuma.




Rego a goeletsa a re, "Tswee-tswee, lo se ke lwa itlhaganelela go thuma bagaetsho, selo se ke lewatle ga se noka."

"Ba emise morutabana!" ga bua Siamisang.

"Se ga se noka, lo tla kgangwa ke metsi."

Ba felegediwa kwa dikamoreng tsa bona ke badiredi ba hotele, koo ba neng ba tlhakanela kamora ba le babedi. Ba tletse ka boitumelo gape ba lebeletse dithoto, ka mo kamoreng le diphuthelwana tsa go ba amogela. Morago ga lobakanyana, ba ba bitsa go ya kwa phaposing ya bojelo go ja dilalelo.



Botlhe ba tobogela ditulo tse dintle kwa tafoleng ya bojelo. Ba sena maitemogelo a gore ba ya go tlhopa eng, gonne dijo tshotlhe tseo ba di tsholetsweng, di sa tlwaelega mo go bona. Badiredi ba hotele ba ba thusa go ba tlhopela dijo le go ba tsholela mo dijaneng tsa bona.

Morago ga gore ba ye ko mafelong otlhe ao, ba neng ba a rulaganyeditswe go a etela, ba ipaakanyetsa go boela morago kwa gae.



Barutwana le Barutabana bao ba apereng diterekesutu, ba namela bese go ya kwa boemelafofaneng. Ba namela sefofane kwantle ga matshwenyego, mme ba fofela morago kwa *East London*.

Morago ba fologa sefofane ba namela ditekisi ba boela gae ba tletse boitumelo. Ba ne ba palelwa ke go itshwara, gore ba goroga leng kwa gae, go ba tlotlela ka maitemogelo a bona. Ba neela Rego leina la Mofago.

Mongwe le mongwe kwa sekolong a itumetse, mme ba ba amogela kwa sekolong. Mo barutwaneng ba mephato e mengwe ba ne ba letile nako ya bona, mo dingwageng tse dilatelang.



DITEBOGO

Mokwadi

Notozi Mgobozi

Motaki

Dale Blankenaar

Morulaganyi 1

Ntombi Kayise Njadayi

Morulaganyi 2

Nelisa Mviko

Morulaganyi 3

Nopasika Xapa

Motlhami

PixelPing Design

Mofetodi

Motlhabane Modise

Motlhotlhomisi

Glanice Masilo



ISBN 978-0-638-00761-9



basic education
Department:
Basic Education
REPUBLIC OF SOUTH AFRICA

